

## Cuscenza

Menzione d'onore al "Viniscola" 2014

Cuscenza mi scarràgghj li difètti  
chi cun tecu no pòssu più cuà,  
mi cinghj e bàtti lu còri m'appretti  
mi gjru in tundu e no sòc'und'andà.  
li 'izi capitali chi sò sètti  
canti 'olti mi li fài ammintà?  
No attizzà lu focu accèsu in mècu  
chi brusgja gjà, paldonàmi ti prècu.

M'arrec'un'ambulòni di bon vïnu  
cussì ci mantinìmu in alligria,  
vidarè chi ci cambighja 'intinu  
siddu mi fài bònna cumpagnìa.  
Tinni stai sirèna illu me sinu  
pa no iscatarà chist'almunia,  
lu 'olaria pàr'abàli sòlu  
dapoì torru a fà lu bòn fiddòlu.

Dammi cunsòlu, no fà l'ammusciàta  
lu socu chi mi 'òi sèmpri bè,  
cuscenza cara sè innammuràta  
un'alta meddu pènsu chi no c'è.  
Mi piaci candu sè rassirinàta  
candu dicu lu chi voi intindè,  
mi dèi dà cunsiddi pa l'affètti  
pal piccati chi dècu cunfissà.

Cuscenza mi scarràgghj li difètti  
chi cun tecu no pòssu più cuà.

## La puisìa

3° posto al premio "Giulio Cossu" Tempio 2012

In tundu pensa cos'è la puisìa:  
la puisìa è vita, è amori!  
È lu criatu, è la fantasia!  
La paci e l'almunia ha in cori.  
Figghjùla una pianta cassisia,  
figghjùla comu sò beddi li culori,  
figghjùla la tarra e lu mari,  
l'esistenzi vii, boni e cari.

Si ti pripari in animu li sensi  
e l'asculiti calma, ti rassirena,  
sviluppa passioni si vi pensi  
emozioni folti ed'entra in vèna.  
In gadduresu ha doni immensi,  
più rari e ti sulléa da la pèna.  
Puisìa mea abali dammi cunsolu,  
arrisettami la menti, sempri in bolu.

No socu solu, cun tecu abali,  
tu sei luci, spantu e midicina,  
sei ammentu, cura pà li mali,  
sei affettu, festa di bon'ingrina.  
Sei di lu mundu lu sali,  
sei preghiera dolci e divina,  
sei un'opara Santa, casta e pìa  
e ti cantu cu la boci di lu cori.

In tundu pensa cos'è la puisìa:  
la puisìa è vita, è amori!

(da considerare "libera" con metrica parziale)

## Tempu

"Menzione d'onore" al 27° concorso di poesia Sarda Ossi (SS) - 2014

Una dì sempr'infattu a l'alta pòni  
e lu barriu si fàci più pisùtu,  
lu tempu di la 'ita è lu timòni  
chi no lassa mànc'ùn sùlchju minùtu.  
No lu 'idi passèndi ma dispòni  
illu passà, di fàtti 'ècchju canùtu,  
vistutu d'èa o nii, soli o 'èntu  
è sempri'n bòlu no fèlm'un momèntu.

Don Baignu m'ammèntu lu cramèsi  
di turrà, a lu ch'èra già passàtu,  
ma lu tempu, la rìsa sinni fèsi  
chi di nisciùnu n'à mài cuidàtu.  
Li minuti, li mèsi e l'anni spèsi  
no torrani palch'è tempu gastàtu,  
agabbatu l'umanu v'è l'etèrnu  
di chidd'anticu e di chistu modèrnu.

Chist'è lu pèrnu chi mòi lu mùndu  
chist'è lu tèmpu chi sèm'aspittèndi,  
pal cà crèdi sarà tempu ghjucùndu  
tempu d'amòri di pàci e di sèndi.  
Cinni scampimi d'ùn bùggju profùndu  
candu gualdiàna mòlti sè' calèndi,  
cand'è vita magnèndi a l'ultimòra  
candu da chistu mùndu sèmu fòra.

Lu sighitti m'accòra e tàndu aspèttu  
palchì tempu tu se'! O malu o bònu.  
Com'arrèi tinn'andi più discrèttu,  
la storia ti rigìstra in dugna tònu.  
Puru si s'è misteriòsu'e sigrèttu,  
siddu ti lassi signàli di sprònu,  
dugna sonu di cosi idda ci'ammènta  
chi dugna tèmpu passàtu frequènta.

Candu stenta lu pàssu a tald'etai  
passa più tempu fèndi mancu ghjèttu  
piddi riminu mànnu e nudda fài  
inutil'è piddàtti chiss'apprèttu.

Di 'incì no n'ài la facultài,  
sempri lu tèmpu ti pidda di pèttu,  
l'aspettu l'ài sòlu illu signori  
candu l'umanu tèmpu sinni mòri.

Accittemu di còri la pulzioni

chi da la nòstra sòlta aèm'aùtu,  
una dì sempr'infàttu a l'alta pòni  
e lu barriu si fàci più pisùtu.

## **Albóri 'n Tarranóa**

1° classificato al premio di poesia (sez. gallurese) al concorso città di Olbia - del 18-12-2015.

Intendu chizzu chizzu illa marina  
mulmurà d'ùndi illu fà di l'albóri\*, \*mormorare di onde nel far dell'albore  
miss' avvigni silenu lu sintóri  
d'una paci suai\*... D' un cunsolu! \*soave  
L' anima lei\*, chì, piddha lu bolu \*lieve  
pisendis' agghjutata da la frina\*. \*venticello del mattino.

A puddhili\* 'n matina a Tarranóa \*l'alba (al canto del gallo)  
stocu d' incantu indrent' a la nuttura,  
l' ària salita suspiri mi fura  
a lu friscu spannendis\* la scena, \*rischiarandosi  
cussì moi la 'ita lena lena\* \*lentamente  
e di luci una sper' appar' a cóa. \*e di luce appare una furtiva visione.

Si rinnóa la dì... Lu soli spùnta;  
a faccammanu\* chì sem' illu branu \*verso il mattino  
dugn' èsseri si sciuta pianu pianu.  
Torrani tiffittàni\* cun cramóri, \*baccani-litigi-scompigli  
v'è cà nasci a la 'ita e v'è cà móri  
volaria lu 'ecchju un' alt' agghjùnta\*. \*aggiunta (allungare la sua vita).

A séra scunt\*\* arrèa la bugghjùra\*\* \*spoglia (dei frutti del giorno) \*\*oscurità  
ch'è di la notti regnanti galana\*, \*regnante galante  
torra, s' allena\* chiddha bram' umana\*\* \*si riposa \*\*quel desiderio ardente  
drummendi l'óri chì facini ponti.  
Cassà\*... Dumani, tòrrini li conti \*chissà  
a la ch' è sempri 'èldi ciuintura!

## A li cullega

(per associazione poeti galluresi Giacomo Murrighili)

Caru cullega facci cumpagnìa  
in chista poetica associazioni,  
ch'emu fundatu pa la puisìa  
pa tutti chissi c'ani la passioni,  
li puetti di dugna fantasia  
mudesti, principianti e li campioni  
mali e boni ci demu cunfruntà  
demu l'alti lingagghj rispittà.

Par'ammintà Ghjacheddu Murrighili  
post'emu lu sò nommu in sozzietài,  
siddhu la musa nostra no si svili  
cassà di middhurà la galitài.  
Send'eu appena intratu illu ghjannili  
m'aragghju presu troppa libbaltài?  
Nisciunu mai sinn'era infadatu  
puru pal chissu mi socu pruatu.

Incuragghjatu m'ani li cullegghi  
da dugna palti e locu illa Gaddhura,  
ancora tu siguru ghjà t'addeghi  
c'ài àutu lu donu di natura,  
chi pal sciuddhì li nodi strinti e legghi  
calcunu de' piddhassi la primura,  
si mi dura salutu e vultantài  
pongu di cori li mè facultài.

In viritài illusu no mi socu  
pal primma cosa 'oddu unì la ghjenti,  
lu chi dicu lu focciu a pocu a pocu  
chena currì e chena fà istenti,  
attinziunendi a cà vò punì focu  
scansendi brei e pultendi bistenti,  
l'amenti scritti ill'antichi quaderni  
li cunfruntemu a li canti moderni.

Eterni poetti no ni smintichemu  
chi ci àni lu caminu signalatu,  
abà però vidim' undi ni semu  
lu ch'emu fattu ghjustu e lu sbagliatu,  
senza cunfronti middhori no femu  
dugnunu piddharà lu sò cuidatu,  
arriscatu mi socu ill'avvintura  
pal tantu bè chi voddhu a la Gaddhura.

Siddhu ci dura lu tempu saria  
di lacà illu locu signi boni,  
caru cullega facci cumpagnìa  
in chista poetica associazioni

## Balboni

Menzione d'onore al XXIV° concorso letterario "CULLEZIU" Sassari 30-05-2015

Maltimuriatu dirruttu  
balboni  
chi suppultendi  
li to' faddhuti scòppi  
spaddh'aggruppitu  
t'abbandoni  
mentrechì  
lu tempu  
scuntiviciatu  
...passa.

Di ciavanagghj  
declamant'ingannadori,  
spalguddhati danni  
cun rancicu feli pachi,  
agghjunghjend'affanni  
...ghjnocchj pigghjatu.

Stài a banda  
chena prattesi  
accurrunchjulatu,  
smuntu, vintu da l'attési  
lagrim'asciuttu  
ill'ultimu  
cumpassàtu siccuttu.

Chena muddhizzi...  
pa' lettu caltoni,  
inn'un guciu ghjlatu  
fracicu d'alghi  
chi lu 'entu spagli.  
"Ti caccia la 'algogna  
lu bisognu",  
sunniendi chelti  
tebbiu calori d'alenu buinu,  
bramendi  
sureddha molti  
dulci cunsolu  
..pa la tò solti.

Olbia li, 03-02-2015

## Campu sulianu

Menzione d'onore al premio Caragnani - Calangianus 12-03-2016

Bianca, misara spoddha la me' tèla;  
in m'ria a ghjettu, lu campu sulianu,  
cumenciu un signu muendi la manu  
l'olzu illa tanca mi pari una 'èla.  
Lu tempu è ghjuntu chi sem'illu branu  
mi faci l'umbra un bracciali di mèla,  
barriu ch'ì, si ghjéla è probu a truncàni,  
pongu l' afficcu, frimini\* li màni. \*fremono

Mi spant' illu pintàni fiori 'n ziru  
spuntat' appena ill'oltu abbandunatu,  
mi trema lu pinnellu assuccunatu,  
una ceddh' è spitticulend' un piru...  
Cascani frondi e più lascu\* un piumatu \*rado  
dugna sisia... incantatu m'ammiru,  
felm'un rispiru trattengu e m'allenu  
zittu zittu, no m'èsci manc'àlenu.

M'appen' un zilibriccu moncu d'àla  
appusintatu illa buccija di canna,  
fossi cu iddhu focciu opara manna  
a front'a soli chi pianu si càla.  
Rimusu\*... minni torru, abbru la ghjanna, \*dopo aver riordinato  
compri la di ch' illu bughghju si sciàla\*, \*si dissipa  
alzu la scala chi polta in sulagghju  
filmu lu pintu una notti di magghju.

Fracuent' avvigliuaragghju chista scena  
pal turramminn' in tempi cabbulati,  
l' occhj mei sarani cunsulati  
da l' ammenti suài chena pena.  
Tengu sendi\* maccar' appicciulati \*beni affettivi  
finz' a scurrimmi sangu illa carena;  
god' un' appen' a luci di candela  
chiddhu campu sulianu illa me' tela.

18-08-2014

## Canta cilaca

Menzione d'onore al 36° Concorso di Posada il 05-08-2017

Frigura d'anghjulu mutu  
eri paraula data,  
una prummissa ghjurata  
trisoru c'aghju paldutu.

T'aghju 'istutu di fiori  
cambiata pal dì di festa,  
l'ammentu solu mi resta  
sutt' a lu friscu dulari.

Chissu chi mori no paca  
li sò debiti a nisciunu,  
li cugliona unu par'unu  
candu lu mundu si laca.

Canta cilaca illu branu  
c'aghju paldutu una sènda,  
canta l'antica leggènda  
canta chi torru galanu.

La dispidit' almunia  
cantam' ancor' una 'olta,  
sciutala chi no è molta  
fà...chi lu bonu mi dià.

Cantu ruffianu c'abbènta  
li firiti di lu cori,  
cantu ch' impresta l'amori  
a cali solu diènta.

No stent' abbeddhu la 'ita  
a cunsumì l'alligrìa,  
di chissu no mi cridià  
la to' spera vidè frità.

Olbia li, 16-02-2015

## Chena sapè

2° posto alla 3<sup>a</sup> edizione Concorso "Paolo Zarzelli" Ajaccio-Corsica 2014

Chena sapè siddh'èri illa me sòlti  
srinti finz'a mancàcci lu faèddhu,  
arrumbati inn'un gùciu di la còlti  
pal capitàli pàddha d'un mannèddhu.  
Ciuaneddhu m'ammèntu ch'èra fòlti  
pidhenditi a mussitti lu baèddhu,  
un tricineddhu d'òssi s'intindia  
siddh'èra fènu o còsti no sapia.

Cun alligrìa ti 'ùlia bè  
e no vinìa mancù la spirànta,  
l'amori siminatu vidarè  
ci poltarà li frùtti in abbondànta.  
Siddhu tu tinni stài insembi a mè  
emu lu tantu ghjùstu e cinn'avànta,  
inn'una stanza v'è lu di magnà  
cillu paltìmu è còlcio ca no n'à.

No passarà lu tèmpu di l'amòri  
pruisti n'èmu in tùtti li stasgioni,  
sò pieni li cumpàlti di lu còri  
cilca di cumprindì la me passìoni.  
Addoca pa la 'ita lu calòri  
com'un focu di chèa di calbòni,  
si socu zinicòni, sè puntèddhu  
punendimi illu d'itu chist'anèddhu.

Insembi è bèddhu ristà  
par'un tempu chèna fini,  
inn'un mundu chi no sà  
ne ridi e ne pignìni.

No à cunfini l'anìma illa mòlti  
ma no smintica l'ultimu basgjèddhu  
chena sapè sidd'èri illa me sòlti  
srinti finz'a mancàcci lu faèddhu.

## La me' rosa

1° premio alla 10<sup>a</sup> ediz. "Su contixeddu" Brescia 26-06-2015 sez poesia Sarda

1

Unu spultinu piènu d'alligrìa  
t'arrecu cun amòri abàl'in dònù,  
lu pongu insemb'a la tò simpatia  
e si mi rèsci dummàndu paldònu  
pa li piccati fatti in piccinnìa,  
cand'a vuletti bè no v'èra bònù,  
ti cant'e sònu una dùlci ninnìa  
paldonami li sbàgli chi facià.

2

No sapia adoràtti la me ròsa  
no sapia la sòliti ringrazià,  
ch'eri tu beddha, bòn'e amuròsa  
cun ritaldu m'avvicu sol' abà.  
La me fata no èsse lastimòsa  
da ogghj socu pròntu pal cambià,  
scusà, mi dèi, chi sòcu pintùtu  
torru intaressi e fùndu risolùtu.

3

Lu c'agghju autu no vòddhu paldi  
sia alumancu finz'a li cent'ànni,  
ti prummettu d'amàtti dugna dì  
chena datti dulori e manc'affànni.  
E' l'ora di li gùsti no pignì  
vi la femu currèndi a caddhi mànni,  
chena danni spirèmu di campà  
chi gusti beddhi c'èmu di pidhdà.

4

T'ài di priparà la balisgèddha  
chi la luna di mèli emu di fà,  
e maccari sii guàsi minnannèddhà  
a facci chissu 'iàgghju dem'andà.  
No sei 'ecchja sè ancora stèddha  
ti lu ghjuru no ti 'òddhu infadà,  
no aspittà, lu tèmp'è cabulèndi  
pon'in balisgja pùru li pruèndi.

Polta li sendi d'òru in almunìa  
cussi lu coddhu biàncu pidhdha tònu,  
unu spultinu piènu d'alligrìa  
t'arrecu cun amòri abàl'in dònù.

Olbia li,01-02-2014

## L'ea

Menzione D' onore al XXXV° premio Posada 6 Agosto 2016

Sciucca-sciucca\* illu lettu chi la teni \*lo sciabordio  
sciumiendi illi intoppi chi v'imbicca\*, \*producendo schiuma negli ostacoli incontrati  
fra tarra e monti ghjunchi e buda\* spicca \*giunchi ed erba palustre  
piddda fua ingrussendisi illi 'eni.

Chena culori limpia luccichenti  
m'ammenta la funtana di Lipponi\*, \*Sito della zona di S. Ant. di Gallura (OT),  
la più liceri, dicini illi zoni,  
frisca tastà scantèndimi li denti.

Abbondanti cussì nisciuna cosa  
susteni l'almunia illa natura,  
c'infundi 'ita sana l'ea pura  
sfranca da la siccagna\* scalmintosa. \*siccità

Traspira in dugna tempu a lu calori  
svapura a pilu d' ea\* e si cunsumi, \*evapora in superficie  
ill' aria si trasfolma in fumacciumi\* \*varie formazioni di nebbia  
e torra fala in tarra pa' l'astrori\*. \*gelata dal cielo (brinata)

Doma lu focu e gran calamitài  
salita a lu riccattu da saori,  
nasci cun iddha dugn' èsseri e fiori\* \*il crescere della vita  
cumpresa l'indumata umanitài.

Li rii, riischédghi e riizzóli\* \*I fiumi, ruscelli e fiumiciattoli  
scurrini da li càntari\* a lu mari, \*sorgenti  
miminigghjani abbeddhu l'ei chjari\* \*diminuiscono parecchio le acque chiare  
pal comu so' gastati\* cinni doli\*\*! \*consumate/sprecate \*\*ce ne dispiace

Chist' è l'essenzia chi natura dona  
lu sa' ancora ca' no è ispeltu,  
no godi stessa solti lu diseltu  
dicciósu un sittu pregnu d'ea bona.

Ea, campiana\* torra in locu meu \*ponderata - tranquilla  
t'aspetta chena danni ca' trabaddha,  
tutti li fiati\* e l'omu di la staddha. \*animali d' allevamento ed altri  
Pioi silena senza dalli anneu\*! \*senza arrecargli danno.

## Luci di ferraùstu

Menzione d' onore Escolca (CA) 2016

Trimulanti li luci allongu ghjettu  
cun middhi culol d'oru e luccichìi  
spicchjati in mari fendi li maì,  
da campagna vic' occhj a lu paesi...  
Parini li me' nalbi panni stesi,  
gudendi chista notti m'arrisettu.

Li stelli 'n limpiu mantu sò briddhendi  
e dugna tantu ni casca calcuna,  
canti 'ntrighi tu fai dolci luna  
lumendi a d' la costa chindi e chici,  
pa li cuppietti è l' ora di disici  
appizzu a l' astri sò innammurendi.

Fochi altifizi, lampi illa natura  
ch' in chista notti m' eti 'mbirriatu  
lu cori meu aeti 'nghiriatu,  
di fà lu steddhu no voddhu spunì!  
Ghjucosi abbagli turreti a fiurì  
briddhenti 'n celi, lei, a cantu dura.

Dumani è ferraùstu... "L'assunzioni"!  
Eti la scena a festa preparatu,  
da chist' alcanu restu spantumatu  
in tanta paci spalta undi soc' eu,  
iddha pal tutti cilla dona Deu  
siddhu ni cumprindimu la rasgioni.

Puru lu caldu pari ammasidatu  
no stricciuligghju più pa lu sudori  
s' asciutta tenamente lu lintori.  
Da chi scurri lu me' sangu illi 'eni  
vò d' ch' esistu, mundu e m' appalteni.  
Pa l'altu ancora aspettu... Accunultatu.

## **Luci di ferragosto** - (traduz. semplice)

Tremolanti le luci da lontano  
con mille colori d'oro e luccichii  
specchiate in mare facendo magie,  
vedo da campagna verso il paese...  
Sembrano i miei nervi panni stesi,  
godendo questa notte mi rilasso.

Le stelle nel limpido manto brillano  
e ogni tanto ne cade qualcuna,  
quanti intrighi tu fai dolce luna,  
illuminando a giorno la costa ovunque,  
per le coppiette è l' ora dei desideri  
accanto agli astri fanno all' amore.

Fuochi d'artificio come lampi naturali  
che in questa notte mi avete viziato  
avete il mio cuore abbindolato,  
di fare il bambino non voglio smettere!  
Giacché abbagli ritornate a fiorire  
brillando in cielo, lievi, finche dura.

Domani è ferragosto... "L'assunzione"  
Avete la scena a festa preparato,  
dal mistero resto meravigliato  
in tanta pace sparsa dove io sono,  
essa per tutti ce la dona Dio,  
se ne comprendiamo la ragione.

Anche il caldo sembra ammansito,  
no sgocciolo più per il sudore,  
si asciuga persino la rugiada.  
Giacché il mio sangue scorre nelle vene  
vuol dir ch'esisto, mondo e m'appartieni.  
Per l'altro ancora aspetto...confortato.

## Luci di pratta\*

\*Luce d' argento

2<sup>a</sup> classif. sez. in rima al concorso di Santu Antine Sedilo 2016

Luna piena, illa notti trina trina<sup>1</sup>,  
spuntendi da la costa pari un faru,  
lu bughju<sup>2</sup> tutt' a unu torri in chjaru  
spicchjenditi briddhenti<sup>3</sup> illa marina.

E' da la sirintina chi t' aspettu  
dapoì ch' è lu soli tramuntatu,  
da lu silenu socu accumpagnatu  
insembi a noti dolci di sunettu<sup>4</sup>.

Cand' arrisettu<sup>5</sup> ascultu lu me' cori  
li capagghjini<sup>6</sup> addocu a lu dumani,  
è beddhu sta' cussì maccar' anziani  
in chistu mundu pintu di cramori<sup>7</sup>.

Spaltu un' abbagliu tu luci di pratta  
pal disingannu mandi a la nattura,  
disispiratu un cantu missi fura  
di chista tarra ca' sarà... la fatta<sup>8</sup>?

Puru una ghjatta avvilguigghja<sup>9</sup> la scena  
lu sà iddha lu comu e lu palchì,  
l'escini dugna tantu miaulì,  
m' allisgia l'anca chiltendi<sup>10</sup> la cena.

Luna silena è notti e pari d'ì  
cu la to' spera m' ài carignatu<sup>11</sup>,  
abali in sonniu stocu allisingatu<sup>12</sup>,  
candu mi sciutu<sup>13</sup> no sare' più ch'ì.

1 scura scura

2 buio

3 specchiandoti brillante

4 organetto

5 quando riposo nella quiete

6 preoccupazioni, assilli

7 dipinto di clamori

8 che ne sarà di questa terra

9 pure una gatta osserva

10 chiedendo

11 accarezzato

12 lusingato, adulato

14 sveglio

## Tarrulu

2° classificato in sa setzioni B versus scapus XXI premiu de poesia SILIUS 2016

Inn'un nibbaru  
siccu maculatu,  
tarruligghj dannaresu  
e no ti 'icu;  
t'intendu zirriuloni  
runzicà,  
in pulvara turrendi  
a muntuneddhi,  
un'antica priziata  
traì tolta,  
chena di te lacà tratta  
ne spera.

Tarrulu infadosu  
lignu sbrinnuligghj  
innantu a me  
e di filmatti no v'à manera.  
Avvilguigghju  
undi bruddhichigghj  
e zittu tinni stài  
un pocareddhu,  
ma sidd'abbassu lu capu  
torri a grattulà,  
t' avveltu com'un chjodu  
illu cialbeddhu!

Mi 'inci lu sonnu  
e sunnigghju  
capagghjni mali,  
fuglietti casticati  
abali moldini  
omareddhi dirrutti,  
ghjochi paddhosi fendi  
in vessi strùmpiti  
tra tulmenti e siccutti.

Tarrulu in mariposa  
muti...sbulazzendi.

## Tarlo

In un ginepro  
secco maculato,  
tarli dannoso  
e non ti vedo;  
ti sento preso dalla fregola  
rosicare,  
trasformando in polvere  
a mucchietti,  
un'antica pregiata  
trave storta,  
senza lasciare traccia  
ne ombra di te.

Tarlo fastidioso  
disintegri legno  
su di me  
e di fermarti non c'è maniera.  
Dove brulichio osservo  
e ti ammutolisci  
un pochino,  
ma se abbasso la testa  
riprendi a grattugiare,  
ti sento comu'un chiodo  
nel cervello!

Mi vince il sonno  
e nel sogno  
vagano i miei cattivi pensieri,  
folletti indiavolati  
adesso mordono  
omini decaduti,  
facendo giochi baldanzosi  
in modi strampalati  
tra tormenti e singhiozzi.

Tarlo in farfalla  
ti trasformi...svolazzando.

(Olbia 01-10-2014)